



Republika e Kosovës • Republika Kosovo • Republic of Kosovo
Institucioni i Avokatit të Popullit • Institucija Ombudsmana • Ombudsperson Institution

Prishtinë, më 30 maj 2022

Znj. Albina Shabani Rama, kryetare
Gjykata Themelore në Prishtinë
Pallati i Drejtësisë, Hajvali
10000 Prishtinë

LETËR REKOMANDIMI

Ankesa Nr.585/2021

Adem Gashi

kundër

Gjykatës Themelore në Prishtinë

E nderuara znj. Shabani Rama,

Avokati i Popullit, në bazë të nenit 16, paragrafi 1, të Ligjit nr. 05/L-019 për Avokatin e Popullit, më 4 tetor 2021 ka pranuar ankesën e z. Adem Gashit, parashtruar kundër Gjykatës Themelore në Prishtinë (GjThP), përkitazi me zvarritjen e procedurës gjyqësore lidhur me lenden e tij *C.nr.1070/19*.

Ankuesi ka pohuar se më 10 prill 2019, lidhur me rastin e birit të tij kishte parashtruar padi për kompensim dëmi. Pos të tjerash, ai ka thënë se më 9 qershor 2017, në fushën sportive të shkollës së futbollit “Shqiponjat”, e cila gjendet në lagjen Arbëri, djali i tij 13 vjeç, gjersa ishte duke u trajnuar për futboll, ishte goditur nga shtylla e portës e cila ishte e pasiguruar me litarin e sigurisë, me ç’ rast kishte përjetuar lëndime të rënda në pjesën e fytyrës dhe të kokës.

Më 25 tetor 2021, përfaqësuesi i Institucionit të Avokatit të Popullit (IAP) kishte biseduar me ankuesin për disa informata dhe sqarime shtesë lidhur me rastin.

Më 8 nëntor 2021, Avokati i Popullit nëpërmjet një shkrese kishte kërkuar informata nga kryetarja e GjThP-së për fazën në të cilën ndodhej procedura në çështjen e ankuesit dhe për veprimet që ishin ndërmarrë apo që planifikoheshin të ndërmerreshin nga gjykata, ashtu që ky rast të procedohej brenda afatit kohor, në pajtim me dispozitat ligjore në fuqi dhe me nenin 6 të Konventës Evropiane për Mbrojtjen e të Drejtave dhe Lirive Themelore të Njeriut dhe Protokollet e saj.

Më 6 janar 2022, përfaqësuesi i IAP-së kishte biseduar me ankuesin lidhur me rastin. Ankuesi kishte thënë se deri më tani gjykata nuk kishte ndërmarrë asnjë veprim për ta proceduar rastin e tij.

Më 18 mars 2022, Avokati i Popullit nëpërmjet një shkrese rikujtuese ka kërkuar informata nga kryetarja e GjThP-së për fazën në të cilën ndodhej procedura në çështjen e ankuesit dhe për veprimet që janë ndërmarrë apo që planifikohen të ndërmerren nga gjykata, ashtu që ky rast të procedohet brenda afatit kohor, në pajtim me dispozitat ligjore në fuqi dhe me nenin 6 të Konventës Evropiane për Mbrojtjen e të Drejtave dhe Lirive Themelore të Njeriut dhe Protokollet e saj.

Më 28 mars 2022, Avokati i Popullit nëpërmjet një shkrese, pos të tjerash, ishte njoftuar nga GjThP-ja: *“Duke marrë parasysh se objekti i kontestit në këtë çështje është kërkesa për kompensimin e dëmit, e cila sipas strategjisë së KGJK-së për reduktimin e rasteve nuk hyn në radhën e lëndëve me prioritet, ju njoftojmë se lënda në fjalë nuk është ende në radhë për t’u trajtuar, pasi gjyqtari i çështjes i ka mbi 900 lëndë kontestimore, një numër i madh janë lëndë të vjetra.”*

Avokati i Popullit rikujton se Kushtetuta e Republikës së Kosovës, si akti më i lartë ligjor, mbron dhe garanton të drejtat dhe liritë themelore të njeriut, prandaj realizimi praktik i tyre është në interes të funksionimit të sundimit të ligjit.

Neni 31 i Kushtetutës [E Drejta për Gjykim të Drejtë dhe të Paanshëm], paragrafi 1, përcakton: *“Çdokujt i garantohet mbrojtje e barabartë e të drejtave në procedurë para gjykatave, organeve të tjera shtetërore dhe bartësve të kompetencave publike.”*

Avokati i Popullit thekson se e drejta për mbrojtje gjyqësore të të drejtave është e garantuar me nenin 54 të Kushtetutës [Mbrojtja Gjyqësore e të Drejtave], ku përcaktohet: *“Çdokush gëzon të drejtën e mbrojtjes gjyqësore në rast të shkeljes ose mohimit të ndonjë të drejte të garantuar me këtë Kushtetutë ose me ligj, si dhe të drejtën në mjete efektive ligjore nëse konstatohet se një e drejtë e tillë është shkelur.”*

Avokati i Popullit vlerëson se është obligim kushtetues i shtetit që qytetarëve t’u garantojë që çështjet e tyre të dëgjohen drejtësisht, publikisht nga gjykata dhe brenda një afati të arsyeshëm, si dhe t’u garantojë mjete juridike efektive. Këto të drejta janë të garantuara me nenet 6 dhe 13 të KEDNj-së, të cilat përcaktojnë: *“Çdo person ka të drejtë që çështja e tij të dëgjohet drejtësisht, publikisht dhe brenda një afati të arsyeshëm nga një gjykatë e pavarur dhe e paanshme (...).”* (neni 6); dhe: *“Çdo njeri, të cilit i janë shkelur të drejtat dhe liritë e garantuara me këtë Konventë, ka të drejtë për mjetet ligjore efektive për rivendosjen e së drejtës nga një autoritet kombëtar (...).”* (neni 13). Pra kërkesat e nenit 13 mbështesin kërkesat e nenit 6 (shih aktgjykimin: *Kudla kundër Polonisë*).

Për më tepër neni 3 i Konventa për të Drejtat e Fëmijëve, paragrafi 1, përcakton: *“Në të gjitha vendimet që kanë të bëjnë me fëmijën, të marra qoftë nga institucione publike ose private të përkrahjes shoqërore, nga gjykatat, autoritetet administrative apo organet legjislative, interesi më i lartë i fëmijës duhet të jetë konsiderata mbizotëruese.”*

Avokati i Popullit nga përgjigjja e gjykatës vëren se pavarësisht se rasti është pranuar më 10 prill 2019, deri më tani gjykata nuk ka ndërmarrë asnjë veprim procedural për ta trajtuar atë.

Nisur nga ajo që u tha më lart, Avokati i Popullit konsideron se zvarritja e mëtejshme e procedurës gjyqësore në çështjen e z. Gashit përbën shkelje të së drejtës për një gjykim të drejtë dhe të paanshëm, prandaj Avokati i Popullit i


REKOMANDON

Gjykatës Themelore në Prishtinë:

- *T'i ndërmarrë veprimet e nevojshme që pa vonesa të mëtutjeshme ta trajtojë rastin C.nr.1070/19.*

Bazuar në atë që u tha më sipër, në pajtim me nenin 132, paragrafi 3, të Kushtetutës së Republikës së Kosovës (“Ka të drejtë të bëjë rekomandime dhe të propozojë masa, nëse vëren shkelje të të drejtave dhe lirive të njeriut nga ana e organeve të administratës publike dhe organeve tjera shtetërore.”) dhe me nenin 28 të Ligjit për Avokatin e Popullit “(Autoritetet, të cilave Avokati i Popullit u ka drejtuar rekomandim, kërkesë ose propozim për ndërmarrjen e veprimeve konkrete, (...) duhet të përgjigjen brenda afatit tridhjetë (30) ditor. Përgjigja duhet të përmbajë arsyet me shkrim për veprimet e ndërmarra lidhur me çështjen në fjalë), ju lutemi mirësisht të na informoni për veprimet që do t'i ndërmerrni lidhur me këtë çështje.

Me nderime,


Naïm Qelaj
Avokat i Popullit